



*Vne femme est guarie du flux de sang, en touchant la robe de Iesus ;
qui aussi ressuscite la fille de Iayrus.*

IESVS ayant passé la mer, fut receu du peuple qui l'attendoit; & voicy venir le principal de la Synagogue, qui auoit nom Iayrus, lequel se iettant à ses pieds l'adora, le priant qu'il entrast en sa maison, pour guarir sa fille vnique, âgée de douze ans, qui se mouroit, & qu'il mist les mains sur elle. Adonc Iesus se leua, & le suiuit avec ses Disciples, & grand peuple le suiuit & pressoit fort. Or y auoit-il vne femme malade de flux de sang, qui depuis douze ans auoit dépensé tous ses biens sans amendement: elle ayant ouy parler de Iesus vint en la foule par derriere, & luy toucha sa robe: car elle disoit, Si tant seulement ie touche le bord de ses vestemens ie seray guarie: & incontinent le flux de sang s'estancha. Iesus lors se retournant dit, Qui m'a touché? Adonc la femme tremblant se ietta à genoux deuant Iesus, manifestant ce qui auoit esté fait en elle. Lors Iesus la regardant luy dit, Fille, ta foy ta sauuée, va t'en en paix. Or comme il parloit encores, aucuns vinrent dire à Iayrus, Pourquoi trauailles-tu le Maistre? ta fille est morte: mais Iesus dit à Iayrus, Ne crains point, crois seulement. Et Iesus alla en la maison avec Pierre, Iacques & Iean, & fit retirer hors vn chacun, hors-mis le pere & la mere de l'enfant, qu'il prit par la main, & la ressuscita, commandant luy donner à manger. Adonc tous furent émerueillez.

S. Matthieu Chap. 9. S. Marc Chap. 5. S. Luc Chap. 8.